



TOSHKENT DAVLAT YURIDIK UNIVERSITETI REKTORINING B U Y R U G ' I

08.11.2024

771-tm-son

Talabaga hayfsan e'lon qilish to'g'risida

O'zbekiston Respublikasi Prezidentining 2020-yil 29-apreldagi "O'zbekiston Respublikasida yuridik ta'lim va fanni tubdan takomillashtirish bo'yicha qo'shimcha chora-tadbirlar to'g'risida"gi PF-5987-son Farmonining 2-bandida zamonaviy talablar, ilg'or xalqaro yuridik tajriba va mehnat bozori ehtiyojlari asosida yuqori malakali, ijodiy fikrlaydigan, halol kadrlar tayyorlashni ta'minlash yuridik ta'lim va fanni yanada rivojlantirishning ustuvor yo'nalishlaridan biri etib belgilangan. Bugungi kunda universitetda zamonaviy xalqaro standartlarga javob beradigan yuqori malakali yuridik kadrlarni tayyorlash maqsadida talabalarni ma'naviy-axloqiy tarbiyalash, huquqiy madaniyati va ongini oshirish bo'yicha samarali tizimni yaratish, ularda yuksak ma'naviy-axloqiy fazilatlarni shakllantirish hamda rivojlantirish maqsadida bir qator kompleks chora-tadbirlar amalga oshirilmoqda.

Shunga qaramasdan ayrim talabalar tomonidan universitet Odob-axloq kodeksi talablarini buzish holatlari kuzatilmoqda.

Jumladan, universitetning Xususiy huquq fakulteti 2-kurs Rus A potok 3-guruh to'lov-kontrakt asosida tahsil oluvchi talabasi Mirjalolov Miryusuf Davron o'g'li va 2-kurs Rus A potok 1-guruhi to'lov-kontrakt asosida tahsil oluvchi talabasi Soyibnazarova Ruxshona Rustamovnalari universitet Odob-axloq kodeksi qoidalari bilan tanishtirilgan bo'lishiga qaramasdan 2024 yil 25-oktabr sanasida dars mashg'ulotlari tugaganidan so'ng oralarida yuzaga kelgan shaxsiy kelishmovchilikni hal qilish maqsadida gaplashib olmoqchi bo'lishgan. Ushbu kelishmovchilik talabalar o'rtasida bundan avval mavjud bo'lgan shaxsiy munosabatlarni butunlay uzish yoki davom ettirish masalasi bo'lgan. Dars jarayonlari tugaganidan so'ng R.Soyibnazarova va M.Mirjalolov talabalar oldida bir-biriga qo'pol munosabatda bo'layotganini ko'rgan 2-kurs V potok 2-guruh talabasi To'ychiyev Shohriyor Murtoza o'g'li qanday muammo borligini so'rab, R.Soyibnazarovaga istasa uyiga kuzatib qo'yishini aytgan. R.Soyibnazarova bunga rozi bo'lgan va ular ketmoqchi bo'lishganida M.Mirjalolov bu muammo ular o'rtasida ekanini, ular bir guruhda o'qishlari va bunga Sh.To'ychiyev aralashmasligini aytgan. M.Mirjalolov holiroq joyda gaplashishni aytib biroz chetroqqa chiqqach Sh.To'ychiyevning yuz qismiga bir marotaba musht bilan urgan. Sh.To'ychiyev bu holatga hech qanday javob qaytarmagan. Ushbu vaziyatga guvoh bo'lgan universitet qo'riqlash xizmati xodimi holatga aniqlik

kiritish maqsadida M.Mirjalolovni ushlab gaplashmoqchi bo'lgan. Vaziyatdan xabar topgan talabani tyutori O.Akbarov zudlik bilan holat ishtirokchilarini chaqirib, ulardan tushuntirish xatlari olish, hamda zaruratga ko'ra tegishli chora ko'rish masalasini hal qilish uchun dekan o'rinbosariga xabar berayotgan vaqtida R.Soyibnazarova 6-qavatga chiqib hojatxona derazasidan o'zini tashlamoqchi bo'lgan. Dekan o'rinbosari N.Xojiyev hamda vaziyat guvohi bo'lgan talabalar uni ushlab pastga olib tushgan. Ushbu holat yuzasidan darhol tuman Ichki ishlar boshqarmasiga va talabalarning ota-onalariga xabar qilingan. Talaba R.Soyibnazarova o'zining tushuntirishlarida u bilan bog'liq barcha muammolarda M.Mirjalolovni aybdor deb hisoblashini aytgan. Ushbu ikki talaba o'rtasidagi muammoli vaziyat bundan oldin ham sodir bo'lib, 2024-yil 7-oktabr kuni talabalarning ota-onalari chaqirilgan, ulardan tushuntirish xatlari olinib, ota-onalar ishtirokida dalolatnoma tuzilgan. Unga ko'ra R.Soyibnazarovanning onasi qizining ruhiy-emotsional holatida biroz o'zgarishlar borligi, psixolog ko'rigida bo'lib kelayotganini ma'lum qilgan. Shundan so'ng talabani tyutori O.Akbarov universitet psixologi bilan aloqaga chiqib, R.Soyibnazarova bilan bog'liq holatdan xabardor qilgan. Psixolog bilan muntazam aloqada bo'lishi va ruhiy holatini nazorat qilib turish maqsadida u bilan ko'riklar tashkil etilgan. Bundan tashqari R.Soyibnazarovanning qiziqishlaridan kelib chiqilib, rasm to'garagiga biriktirilgan.

R.Soyibnazarova hamda M.Mirjalolov bilan olib borilgan chora-tadbirlar, ma'naviy-ma'rifiy suhbatlarga qaramasdan ular o'rtasidagi muammo yana yuzaga kelgan va hatto bu safar jiddiy tus olgan. IIB profilaktika inspektori, xotin-qizlar bilan ishlash bo'limi xodimlari vaziyatni o'rganib, zaruriy choralar ko'rishlarini ma'lum qilgan hamda universitet bilan hamkorlikda R.Soyibnazarovanning ota-onasi ishtirokida talabani ruhiy-emotsional holatini yaxshilash maqsadida qator ishlar amalga oshirilishi belgilangan.

Yuqoridagilardan kelib chiqqan holda talabalar universitet va jamiyatda yurish-turish qoidalarini buzilishiga olib kelgan bir qator xatti-harakatlarni sodir etgan. Talabalar mazkur harakatlari bilan universitet Oдоб-axloq kodeksi

17-moddasining ikkinchi xatboshisi (har qanday huquqbuzarlik yoki jinoyat sodir etish, jumladan, tuhmat qilish, haqoratlash), 18-moddaning ikkinchi xatboshisi (Xodim, talaba va doktorantlarning o'zaro munosabatlarida inson qadr-qimmatiga hurmatsizlik, shaxsiyatni kamsitish, o'zganing intellektual mulki yoki boshqa ijod mahsulini ruxsatsiz o'zlashtirib olish, qo'pollik, behayo so'zlar ishlatish, mushtlashish qat'iyon man etiladi), shuningdek, majburiyatlari ko'rsatilgan 26-moddaning yettinchi xatboshisi (Universitet obro'-e'tibori va nufuziga dog' tushiradigan har qanday harakatlarni sodir etishdan o'zini tiyishga), o'n birinchi xatboshisi (biron-bir noxush voqea yoki hodisa ro'y bersa, u haqda zudlik bilan Universitet rahbariyatiga xabar berishga), o'n to'rtinchi xatboshilari (Universitet ishchanlik obro'si yoki nufuziga putur yetkazadigan nizoli vaziyatlarga yo'l qo'ymaslikka), hamda 27-moddaning yettinchi xatboshisi (talaba yoki doktorant bilan nizoli vaziyat yuzaga kelganda o'z hissiyotlarini jilovlashga va mazkur vaziyatni ko'rib chiqish bo'yicha tegishli bo'linma va xodimlarga (murabbiy (tyutor), dekan, O'zbekiston yoshlar ittifoqi boshlang'ich tashkiloti, Ma'naviyat va ma'rifat markazi, Talabalar assotsiatsiyasi) murojaat qilishga) talabalarini

buzishgan.

Toshkent davlat yuridik universiteti Odob-axloq kodeksining 17, 18, 26, 27-moddalariga asosan

BUYURAMAN:

1. Universitetning Xususiy huquq fakulteti 2-kurs talabasi Mirjalolov Miryusuf Davron o'g'li va Soyibnazarova Ruxshona Rustamovnaga universitet Odob-axloq kodeksining yuqorida ko'rsatib o'tilgan moddalarini buzganligi sababli hayfsan intizomiy jazosi qo'llanilsin.

2. Fakulteti dekani (B.Musayev):

ushbu buyruq bilan barcha talabalarni tanishtirsin;

mazkur holat va shu kabi qoidabuzarlik ushbu talabalar tomonidan takroran sodir etilsa, ularni talabalar safidan chetlashtirish mumkinligi to'g'risida ogohlantirsin;

mazkur talabalarning shaxsiy hujjatlar yig'majildiga buyruq nusxasi tikilishini ta'minlasin.

3. Mazkur buyruq bajarilishini nazorat qilish Yoshlar masalalari va ma'naviy-ma'rifiy ishlar bo'yicha birinchi prorektor A.Xashimhonovga yuklansin.

Rektor v.v.b.



I.RUSTAMBEKOV

Toshkent shahar

Kiritildi:

Dekan (fan doktori yoki fan doktori
(Doctor of Science) ilmiy darajasiga
yoki xorijiy davlatlarning unga
tenglashtirilgan boshqa ilmiy
darajalariga yoki professor ilmiy
unvoniga ega bo'lgan)

B.MUSAYEV

**Kelishildi:**

Yoshlar masalalari va ma'naviy-
ma'rifiy ishlar bo'yicha birinchi
prorektor

A.XASHIMHONOV



Direktor

SH.PO'LOTOV



Katta yuriskonsult

A.TURSUNOV

